

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23) i člana 6d. i 6 e. Zakona o plaćama i naknadama sudija i tužilaca u FBiH („Službene novine FBiH“ broj: 72/05, 22/09, 55/13 i 61/22), na prijedlog Ministarstva za pravosuđe i upravu, Vlada Zeničko-dobojskog kantona, na 37. sjednici, održanoj dana 28.09.2023. godine, d o n o s i

UREDBU

O NAKNADAMA SUDIJA I TUŽILACA U PRAVOSUDNIM INSTITUCIJAMA

Član 1. **(Predmet)**

Ovom Uredbom uređuju se visina naknada za odvojeni život od porodice i smještaj u mjestu rada sudija, tužilaca i stručnih saradnika općinskih sudova, Kantonalnog suda i Kantonalnog tužilaštava na području Zeničko-dobojskog kantona (u daljem tekstu: pravosudne institucije) i visina, uvjeti i način ostvarivanja naknade na osnovu vremena provedenog u obaveznom dežurstvu ili pripravnosti za rad (u daljem tekstu: pripravnost za rad) u pravosudnim institucijama.

Član 2. **(Naknada za odvojeni život od porodice i smještaj u mjestu rada)**

(1) Sudije, tužioci i stručni saradnici u pravosudnim institucijama, čije je mjesto prebivališta udaljeno više od 70 kilometara od mjesta rada pravosudne institucije u kojoj obavljaju dužnost, imaju pravo na naknadu troškova za odvojeni život od porodice u visini od 250,00 KM mjesečno i pravo na naknadu troškova smještaja u mjestu rada u visini od 250,00 KM mjesečno.

(2) Pravo na naknadu za odvojeni život od porodice i naknadu za troškove smještaja u slučajevima iz stava (1) ovog člana ostvaruje se na osnovu pisanog zahtjeva, uz koji se prilaže dokaz o prebivalištu i ugovor kojim se reguliše korištenje smještaja.

Član 3. **(Naknada za pripravnost)**

(1) Pripravnost za rad je posebni oblik rada kada sudije i tužioci ne moraju biti prisutni na radnom mjestu, ali moraju biti dostupni radi obavljanja poslova iz svoje nadležnosti.

(2) Radnim vremenom ne smatra se vrijeme u kojem je sudija i tužilac pripravan odazvati se pozivu pravosudne institucije za obavljanje poslova ako se ukaže takva potreba.

(3) Pripravnost za rad radnim danima traje 16 sati, a neradnim danima i u dane državnog praznika 24 sata.

(4) Naknada za pripravnost za rad iz stava (1) ovog člana u radne, neradne dane i dane državnog praznika određuje se u odnosu na osnovnu mjesečnu plaću srazmjerno vremenu trajanja pripravnosti za rad i iznosi 7 % od vrijednosti redovnog sata.

(5) Kada se u toku trajanja pripravnosti za rad pojavi potreba dolaska sudije i tužioca na radno mjesto i potreba za radom takav rad se smatra radnim vremenom i tretira se kao rad u pripravnosti.

(6) Sudije i tužioci imaju pravo na naknadu iz stava (5) ovog člana koja se određuje u odnosu na osnovnu mjesečnu plaću srazmjerno vremenu provedenom na radu gdje se vrijednost redovnog sata uvećava za 15 % za rad u radne dane, a 25% za rad u neradne dane i dane državnog praznika.

(7) Naknada za pripravnost za rad i naknada za rad u pripravnosti se međusobno isključuju.

(8) Pravosudne institucije obavezno vode službene evidencije iz stava (4) i (6) ovog člana.

Član 4.
(Rješavanje o naknadi)

(1) Naknade predviđene u odredbama člana 2. i 3. ove uredbe ostvaruju se donošenjem rješenja.

(2) Rješenje iz stava (1) ovog člana donosi rukovodilac pravosudne institucije.

Član 5.
(Nadzor)

Nadzor nad primjenom ove uredbe obavlja Ministarstvo za pravosuđe i upravu Zeničko-dobojskog kantona.

Član 6.
(Usklađivanje akata)

Pravosudne institucija dužne su svoje akte uskladiti s ovom Uredbom u roku od 30 dana od dana stupanja na snagu ove uredbe.

Član 7.
(Stupanje na snagu)

Ova uredba stupa na snagu osmog dana od dana objavljivanja u „Službenim novinama Zeničko-dobojskog kantona“.

PREMIJER

Amra Mehmedić

Broj: 02-02-14754/23

Datum, 28.09.2023. godine

Z e n i c a

DOSTAVLJENO:

1x Ministarstvo za pravosuđe i upravu,

1x „Službene novine Zeničko-dobojskog kantona“,

1x a/a.